

四庫全書

史部

欽定四庫全書

平定準噶爾方略續編卷一

乾隆二十五年三月庚戌

命犒凱旋之索倫等官兵

上諭軍機大臣曰兵部奏稱凱旋之索倫吉林察哈爾等官兵經過京城請於德勝門外教場暫為休息再行起程等語所奏甚是伊等俱軍前効力之人咫尺京師若即令過行非所以示體恤現在各

隊官兵陸續到京著內務府大臣會同特派之御
前大臣侍衛等照看賜以飯食稍為休息再令其
各回本處

命將軍兆惠等查奏官兵親屬陣亡人數

上諭軍機大臣曰軍營効力有功及陣亡官兵等俱
據奏節次勅部議叙議卹至父子兄弟祖孫三人
內有二人陣亡者即未著有勞績而情尤可憫自
應格外加恩著將軍兆惠等陸續查奏

命優卹陣亡官兵奴僕等

上諭軍機大臣曰軍營効力有功及陣亡官兵朕皆分別加恩叙卹至官兵奴僕陣亡均屬為國捐軀自當加恩議卹著查明交部若官員奴僕陣亡將伊子弟准其開戶為民如係兵丁奴僕著酌賞伊主身價亦准其為民即照陣亡例議卹其昭忠祠祭祀列名於兵丁之次以示優獎

諭御前侍衛署副都統安泰等辦理哈薩克入

觀事宜

上諭軍機大臣曰安泰等奏稱哈薩克阿布勒瑪木
比特阿布賚等遣呼圖拜阿塔賚等至烏魯木齊
恭進馬匹並求入覲謹將奏章封進等語看來哈
薩克等恭順有加著降勅獎諭俟納旺抵烏魯木
齊安泰即令其同往仍傳諭來使云已代爾等奏
請入覲恩旨派侍衛薩穆坦護送來京沿途行走
亦不必過急一日約百里以外併傳諭黑龍江將

軍綽爾多前所派索倫兵一千若尚未派出即行
停止或業已整裝亦令其在該處候旨併傳諭成
衮扎布等知之

賜哈薩克阿布勒瑪木比特阿布賚等

勅書

皇帝勅諭哈薩克阿布勒瑪木比特阿布賚阿布勒
比斯哈巴木拜等去歲爾等哈薩克之人搶掠烏
梁海我將軍大臣等即欲興師問罪朕因爾阿布

賚等歸誠已久須詢問確實續因爾等貿易之人
告稱搶掠烏梁海係爾處之巴魯克巴圖魯則與
爾等無涉但爾等受朕深恩若力能擒獻巴魯克
巴圖魯更見惻誠特遣侍衛納旺傳諭尚在中途
爾等已遣使貢馬並求入覲或爾等知烏梁海被
掠之事悚懼祈請以昭恭順朕益鑒爾等誠意爾
等但遵旨將搶掠烏梁海等所獲察出送還即巴
魯克巴圖魯亦尚可加恩宥嗣後惟約束所部

以安生業至爾等所奏遵旨與布魯特和好而去
年貿易人等為所掠奪等語凡爾等外藩使人來
京朕皆面諭以和輯鄰部將來布魯特入覲必更
加訓諭務使守法安生不至互相戕賊爾等來使
已命侍衛等護送來京至日自加恩賞今以降勅
賜緞各四端爾等其祇受敬悉特諭

賜御前頭等侍衛敦察拜哈巴圖魯號賞銀一百兩

壬子

諭巴里坤辦事道銜同德等解送葉爾羌馬匹

上諭軍機大臣曰同德等奏稱准楊應琚咨將巴里

坤牧馬一千一百八十餘匹交存泰於三月十五

日起程由朱爾都斯賽里木一路送往葉爾羌等

語近據舒赫德奏請送馬三千匹朕以五古業已

送馬二千匹諭同德再選一千匹送往今所奏與

朕旨相符著沿途加意照看牧放毋致傷損遺失

癸丑

諭參贊大臣舒赫德等補授各城阿奇木伯克

上諭軍機大臣曰舒赫德等奏烏什阿奇木伯克員缺甚屬緊要請以玉素富之弟阿卜都拉補授又據阿桂請以拜城阿奇木伯克噶岱默特補授咨送奏稿前來查和闐六城之阿奇木伯克尤屬緊要請以噶岱默特調補其拜城之缺令伊子阿卜都喇瑪補授照英噶薩爾等城例作為四品等語烏什阿奇木伯克著阿卜都拉補授和闐阿奇木

伯克著阿什默特補授喀什噶爾阿奇木伯克著
噶岱默特補授葉爾羌阿奇木伯克著鄂對調補
阿克蘓阿奇木伯克著色梯巴勒氏調補英噶薩
爾阿奇木伯克著索勒屯和卓補授其拜城阿奇
木伯克作為四品即著阿卜都喇瑪補授

甲寅

諭叅贊大臣阿桂等伊犁辦事屯田各事宜

上諭軍機大臣曰阿桂奏稱官兵回人過穆素爾嶺

時即領兵二三百名在呼爾岱等處搜捕嗎哈沁
令伊柱先往海努克督課回人耕作若豐訥亨已
到即與同行否則暫留阿克蘓俟五吉送馬到日
續來接濟等語所辦甚是伊犁辦事需人常亮現
在丁憂來京著即帶關防馳驛前往交阿桂收掌
協同辦事又所奏圖桑阿固世衡現在葉爾羌請
派調一員等語俱著前往伊犁協辦又所稱官兵
行糧例載滿洲索倫等兵丁月支羊三隻綠旗兵

月支二隻現在伊犁未通貿易綠旗兵於開墾營
造亦屬勤勞請一體支給俟秋收後再照舊例等
語著照所請行來年所發屯田兵丁秋收前亦照
此辦理其烏什之貧回五百餘人亦准將霍集斯
所存糧石酌量借給以為籽種秋收時照數扣還
併傳諭舒赫德知之

丁巳

諭定新疆闢毆殺人之例

上諭軍機大臣曰永寧等奏稱固原州回民林福與民人馬友飲醉互毆扎傷馬友殞命將林福擬以絞候解送巡撫衙門報部入於秋審案內等語哈密尚與肅州相近若伊犁葉爾羌等處又焉能長途解送肅州此等新定地方立法不可不嚴將來內地貿易人民與回人雜處凡關毆殺人之案即應於本處正法庶凶暴之徒知所儆畏非可盡以內地之法治也著傳諭各該駐劄大臣等遇有似

此案件即遵照辦理俟新疆一切就緒再降諭旨
其林福一犯不必解送肅州著即行正法

己未

上御同樂園

召哈密郡王品級貝勒玉素富郡王品級貝勒霍集
斯貝勒品級貝子鄂對等四十六人

賜衣服茶果

諭定邊左副將軍成袞扎布等辦理都爾伯特屬人

事宜

上諭軍機大臣曰成袞扎布奏稱都爾伯特汗索羅木袞布之喀屯布尼達喇告稱自扎奇魯克齊策塔爾等滋事以來副管旗章京巴顏克什克等頗屬誠心効力請卽以該章京等代策塔爾等之任等語策塔爾獲罪由巴顏克什克等告訐若卽補其員缺則無知之徒又復以告訐為能妄生希冀且扎奇魯克齊現有和通辦理巴顏克什克等不

過令其協助足矣其所查策塔爾等牲隻什物即
令索羅木衮布分賞所屬不必歸公

命以軍營解京回人等分別安插發遣

上諭軍機大臣曰軍營陸續解送之回人內特穆爾
汗之後裔莽蘓爾哈什木著加恩授為頭等台吉
舊和卓之孫阿卜都爾璘和卓著加恩授為二等
台吉歸併額色尹等佐領下安插其霍集占之舊
索丕摩羅瑪里木等皆附和逆賊之人雖從寬免

死未便留京著并其家口發往廣東福建浙江江南等處賞給官兵為奴

命加賑陝省沿邊州縣

上諭大學士曰上年陝省沿邊一帶偶被偏災業經加恩賑恤現屆青黃不接之際麥秋未至而例賑已停農民口食未免仍有拮据著再加恩將被災五分以上之定邊榆林葭州神木府谷懷遠等六州縣無論極次貧民俱加賑兩月被災五分之安

定延川宜川等三縣俱加賑一月照例折給以資接濟該部遵諭速行

壬戌

命安置回部郡王品級貝勒霍集斯於京師

上諭軍機大臣曰朕詢問霍集斯以烏什回衆等告伊父子情事據奏稱因回人等與伊不合是以被控今懇情留京等語其意殊屬誠切著照所請厚為資給安置京師但其先世墳墓遠隔故鄉著加

恩將伊幼子托克托索丕遣回阿克蘓以供祭掃
其烏什所有田產即行變價在阿克蘓置業賞給
托克托索丕承管著舒赫德等遵照辦理仍傳諭
該處回衆俾咸知朕意

命護視回部舊和卓木等墳墓

上諭軍機大臣曰逆賊霍集占等雖負恩肆惡自取
誅戮至其先世君長一方尚無罪戾今回部全定
喀什噶爾所有從前舊和卓木等墳墓可派人看

守禁止樵採污穢其應行修葺分例並著官為經理以昭國家矜恤之仁而外藩等亦共知所激勸著舒赫德新柱等即遵諭行

癸亥

諭陝甘總督楊應琚等停止購辦商駝

上諭軍機大臣曰舒赫德楊應琚奏稱運送伊犁屯田兵丁口糧需駝三千餘隻除現存千餘隻外再將哈密闢展貿易人等所有駝隻採買一二千始

足敷用等語伊犁駐兵屯田祇宜節次措辦阿桂等現在前往自應計其收穫何如再行添派兵丁則駝隻亦不能預定且官買商駝諸多未便設該商等聞風不前則緩急何所取資即著傳諭楊應琚速行停止仍將原奏議覆併諭伊等知之

甲子

諭參贊大臣舒赫德等酌調臺站馬匹

上諭軍機大臣曰舒赫德奏稱由阿克蘓至伊犁臺

站馬匹不足請將庫車所有之馬千餘匹選擇備用等語駐兵屯田關係緊要臺站馬匹必須充足今烏魯木齊所易哈薩克馬匹甚多著即酌量調用仍宜善為牧放不可因哈薩克貿易馬匹源源接濟遂可任其倒斃損傷著加意妥協辦理

諭叅贊大臣阿桂等辦理伊犁屯田事宜

上諭軍機大臣曰阿桂奏稱現在辦理屯田兵丁回人等於二月二十五日起程伊柱亦陸續行走至

阿克蘓督辦農具又湊出馬匹之伊沙噶頗拉特
烏什辦事之葉爾羌噶雜納齊薩里等各賞給緞
疋等語阿桂此次奮勉辦理甚屬可喜回人頗拉
特等亦俱能急公趨事著加恩分別加賞緞疋以
示鼓勵至所奏聞哈薩克有搶掠烏梁海之事伊
等若來伊犁請體察情形加意防範等語哈薩克
阿布賚等現在恭順有加其滋事特一巴魯克巴
圖魯已命納旺前往傳諭索取若哈薩克等前來

金定回疆方略卷一
伊犁當佯為不知密加防範不必使回人等知之
恐伊等性多疑畏於事無益至巡查塔爾巴噶台
亦以屯田餘力酌量辦理不必過於急遽

議新疆屯田糧運及設官駐兵事宜

叅贊大臣舒赫德阿里衮陝甘總督楊應琚等
奏言來年前赴伊犁之滿漢兵丁四千名及大
臣官員跟役等共需七個月口糧一萬零五百
石屯田籽種一千五百石除羊隻抵支四千五

百石外實運糧七千五百石需用駝三千餘隻
除哈密闢展官駝一千餘隻尚須購買商駝一
二千隻并於肅州等處辦買驢騾一千五百頭
備用又臣等前奉

諭旨酌議新疆添設文武員弁請於伊犁阿克蘇葉
爾羌各設總兵一員兵備道一員其同知通判
都司遊擊及佐雜千把等員弁均按南北兩路
情形添設列單恭呈

御覽奏入得

旨軍機大臣議奏尋議伊犁屯田駐兵原係將來次第辦理之事未便以數千官兵回衆同時並集於久曠之地以增餽運之勞應俟阿桂辦理就緒視其足敷若干人口食再行酌量加增至採買商駝並非急需之務轉令貿易民人聞風疑懼而驢騾一項尤與口外不宜業經奉

旨停止應毋庸議至伊犁回部各處俱有辦事大臣

已足控制遠近若添設鎮道以下各官既與口
外體制不符而一切建造衙署添設俸工俱從
內地經理更滋煩費且回衆不相浹洽易起猜
疑殊未妥協亦毋庸議總之新疆非巴里坤哈
密可比當因地制宜在回城固不宜久駐官兵
即伊犁一帶亦仍當以滿洲將軍大員駐守統
俟阿桂辦理一年之後再行酌辦可也奏入
上從之

戊辰

命正藍旗蒙古都統新柱前往葉爾羌辦事所遺員

缺以叅贊大臣巴祿補授

己巳

上以回部各使人等於二十五日庚午起程

御長春園澹懷堂

賜哈密郡王品級貝勒玉素富郡王品級貝勒霍集

斯貝勒品級貝子鄂對等四十六人宴畢

召至同樂園

賜茶果又

諭軍機大臣曰此次入覲回人等賞賜頗多伊等亦有自置之物念其初來京師僱覓馱載維艱是以官為辦理但伊等若視為成例亦非經久之道著護送大臣等善為曉示仍傳諭永寧此等回人至哈密時即用所留馬匹更換若原數稍有倒斃亦酌量代為僱覓起程毋庸官辦

諭叅贊大臣阿桂等曉示哈薩克事宜

上諭軍機大臣曰成衮扎布奏據薩拉布拉克卡倫
送到從哈薩克脫出之厄魯特和屯博勒等告稱
現在哈薩克等游牧已遷移塔爾巴噶台又聞伊
等因巴魯克巴圖魯搶掠烏梁海一事恐大兵查
拏致累議令將人丁牲畜送還倘仍不從即當擒
獻等語哈薩克遷移游牧之信其果否雖難遽定
但伊等部落人衆素無約束或有數戶人口潛來

居住亦未可知著傳諭阿桂酌派官兵數人往探
虛實伊等果有踪跡即曉譬利害諭以此地為天
朝平定將來辦理駐兵爾等從前在準噶爾時尚
不敢越界此時豈可私行游牧立行驅逐出界併
傳諭納旺見阿布賚時務即索取搶掠烏梁海之
人或探知塔爾巴噶台有哈薩克等亦即以已意
曉示阿布賚令其移回俱著伊等相機辦理
授領隊大臣巴圖濟爾噶爾為內大臣

庚午

命陞賞安臺効力之伯克薩里等

舒赫德奏言臣於二月十九日自葉爾羌起程
三十日抵阿克蘓查詢應設臺站處所由阿克
蘓至穆素爾嶺請設六臺嶺上無水酌為步站
過嶺至海努克臺站人數酌量增添為三大臺
俱派察哈爾總管敏珠爾原任副都統揚桑阿
辦理至官兵需用馬匹惟烏什尚可酌派現在

烏什之伯克薩里等願為承辦謹將臺站地名里數及官兵回人馬匹數目具奏奏入

上諭軍機大臣曰伊犁臺站馬匹伯克薩里額塞木圖拉等願為承辦殊屬効力昨據舒赫德奏以阿卜都拉補烏什阿奇木之缺薩里即無職掌但遇有伊沙噶等缺亦可補授著傳諭舒赫德若烏什未有伊沙噶之缺則各城有伊應陞缺出亦可奏補仍與額塞木圖拉俱酌量獎賞綬疋

諭叅贊大臣舒赫德察核霍集斯等應得屬人產業
上諭軍機大臣曰霍集斯霍什克伯克請留京居住
將伊等帶來屬人及留住該處之戶口具奏又有
烏什和闐哈密吐魯番應取來京之人及遣往原
處回人俱加恩照所請行但霍集斯所請賞給伊
子托克托索丕屬人內多伊族且產業頭緒繁多
著傳諭舒赫德等查明伊所派屬人果係世代僕
役卽照所請賞給或乘便指派官人則不可給與

其霍什克伯克請在和闐安插之耕種回人及哈喇哈什所屬巴塔木蘓扎等處房產是否舊日原業一併查明辦理如實係伊等故物絲毫不可令其入官若稍有影射不實斷不可任其得遂儼倖之計著將原奏一併錄寄閱看

命定邊左副將軍成袞扎布等停派喀爾喀等處兵丁及駐劄布延圖事宜

上諭軍機大臣曰成袞扎布奏准策布登扎布等咨

現在領兵三百前往布延圖應需預備口糧所有
從前奏派喀爾喀兵一千名向塔爾巴噶台駐哈
薩克邊界之處應行請旨辦理等語前經安泰以
哈薩克入覲貢馬情形具奏是阿布賚等恭順有
加已將所調索倫兵一千名停止近日脫出之厄
魯特等又有哈薩克人等欲擒獻巴魯克巴圖魯
之語則喀爾喀扎哈沁之兵俱可不用策布登扎
布前往布延圖之處亦可一併停止朕於軍行進

止惟相度機宜必不肯徒勞師旅倘哈薩克將來
竟不擒獻巴魯克巴圖魯其勢必須用兵俟臨時
再降諭旨

定邊左副將軍成衮扎布解送都爾伯特汗索
羅木衮布所屬欺主滋事之策塔爾等十四人
至京

命分別發遣廣東福建等處

辛未

命加索倫總管薩壘副都統職銜

軍機大臣遵

旨查奏軍營官兵親屬陣亡較多之索倫馬甲登濟

圖引

見得

旨登濟圖著照驍騎校職銜即用

壬申

命吐魯番郡王額敏和卓之子木薩遇阿奇木缺即

補

上諭軍機大臣曰據楊應琚奏前往英噶薩爾勸導
回人等耕種謀生令木薩明切曉示衆皆誠心聽
受踴躍奮勉等語木薩係額敏和卓之子頗屬効
力近將玉素富之弟阿卜都拉授為烏什阿奇木
木薩自應加恩一體補用現在未有缺出著傳諭
舒赫德遇有各城阿奇木缺出時即以木薩奏補
諭陝甘總督楊應琚等酌籌新疆屯牧事宜

上諭軍機大臣曰據楊應琚奏巴里坤現存馬一千
二三百匹而甘肅各營馬匹每年例應出廠巴里
坤一帶水草豐裕請於安西等五處提鎮標營摘
撥三千匹赴巴里坤牧放即於此內撥出一千五
百解赴阿克蘇其伊犁屯田需馬九百匹竟由巴
里坤解往烏魯木齊預備其餘俱存巴里坤牧放
備撥等語所辦自屬可行但不知內地馬匹是否
足數調撥若已經照數撥往則缺額竟不必亟於

籌補甘肅綠旗額馬視他省較多原為邊防起見
今西陲平定則各營馬匹不過供應差操足矣況
巴里坤水草既佳同一牧放而於馬有益且省飼
秣之費豈不甚便又如各營額缺有必須購補者
即於哈薩克馬匹內酌量抽撥亦可不必於內地
採買致費周章或秋冬之際有必須收槽馬匹臨
時預為奏聞至該督前奏伊犁等處設官屯田事
宜已據軍機大臣議奏行知矣總之新疆自應次

第經理不可懈弛亦無庸急遽惟各就本地情形
因利乘便隨時酌辦以規久遠之計若又大費內
地財力以為設官屯田之用殊屬無謂且軍務現
已全竣而收買駝騾紛紛滋擾愚民轉致猜疑亦
豈休息靜鎮之道併傳諭舒赫德等知之

甲戌

諭巴里坤辦事道銜同德停辦商駝及稽察牧羣事

宜

上諭軍機大臣曰同德奏准舒赫德等行文將巴里坤之馬於六月間挑選九百匹送往阿克蘇將駝騾驢頭內擇其臙壯者送往烏魯木齊其現有駝七十五隻又購買商駝四百餘隻俱於三月間緩行送往等語近因楊應琚以籌辦伊犁屯田駐兵各事宜具奏朕諭以次第辦理不宜急遽亦毋庸購買商駝今同德等業經據文辦理嗣後不必再行仍曉示商人以停止緣由則價值自然平減至

巴里坤牧放馬駝一事據奏交齊大勇辦理齊大
勇才具平常若經管未能妥協雖叅處亦屬無益
仍當留心稽察再於巴里坤滿員內派一人協辦
賜打牲總管阿爾哈爾沁察達克齊巴圖魯號賞銀
一百兩

夏四月乙亥朔

命賞給在京安置回人祿米

上諭軍機大臣曰伯克霍集斯霍什克伯克額色尹

瑪木特圖爾都和卓等安置京師著照伊等應得俸銀賞給祿米以資養贍嗣後在京安置回人俱遵照辦理

丙子

命索倫達呼里應授總管等官借補食俸

上諭軍機大臣曰此次索倫達呼里等軍前甚屬効力因加恩額外補授總管副總管等官但缺少人多候補尚需時日著將候補總管副總管暫以佐

領借補候補佐領驍騎校暫以驍騎校領催借補俱照原品給與俸餉俟應得缺出即補庶於伊等生計有益該將軍等即遵諭行

議給索倫等官兵俸餉事宜

黑龍江將軍綽爾多奏言欽奉

恩旨賞給打牲之索倫達呼里官員半俸揀選兵丁二千名賞給半餉查乾隆七年軍機處議覆呼倫貝爾博爾德曾經出兵之壯丁二千三百九

十餘名俱給與錢糧候缺出裁汰至二十四年
裁過一千三百三十餘名尚存一千五十餘名
未便入於新選兵內請於軍前撤回之索倫達
呼里等未得錢糧者揀選二千名賞給得

旨軍機大臣議奏尋議索倫達呼里等向未給與俸
餉今蒙

恩軫念伊等効力軍前准照呼倫貝爾等官兵之例
賞給自應於軍前撤回官兵內揀選不必將從

前給餉候裁之人派入至撤回官兵等現始到京回抵游牧候該將軍等揀選即屆七八月之間請以八月初一日為始即行給與俸餉奉入上從之

丁丑

諭叅贊大臣舒赫德辦理屯田事宜

上諭軍機大臣曰舒赫德從前議奏伊犁屯田一時即欲移駐數千兵丁回衆朕見其意在作難降旨

訓飭嗣於會議屯田摺內並無一語提及阿桂前往伊犁一事其意特以阿桂奮然請行即謂與伊無與將來辦理若稍有掣肘當惟伊是問復經飭諭今據具摺回奏並請竭蹶自効著傳諭舒赫德伊非不能辦事之人一切惟宜實心盡力此時若與阿桂和衷商酌善為協力成全非特二人均任其功伊之出力仍當在阿桂之上其或意存沮抑則朕亦自能鑒察至所奏烏魯木齊牧放哈薩克

馬匹於來年送往屯田處備用自後仍多為市易
送至阿克蘇等語所見甚是馬匹就近撥用較之
巴里坤辦解行走便易臆分亦足即照此辦理朕
以屯田一事委之舒赫德其加意勉之

諭叅贊大臣阿桂等會商搜捕逸賊事宜

上諭軍機大臣曰舒赫德奏搜捕藏匿嗎哈沁一事
擬咨商阿桂於抵伊犁時候馬匹送到即領兵赴
伊犁上游渡特克斯向空格斯哈什搜捕安泰領

兵往額林哈畢爾噶等處越博羅布爾噶蘓嶺至
洪郭羅鄂博和洛霍斯齊齊罕車濟搜捕再循行
伊犁河之阿布蘭山與阿桂會合等語著將原奏
錄寄阿桂等閱看伊等如馬力有餘即照此行走
或稍有不足亦不必勉強仍將作何辦理情形具
奏

命陞叙三等侍衛齊克慎等

上諭軍機大臣曰舒赫德奏三等侍衛齊克慎伊凌

阿藍翎侍衛阿玉什從前大兵被遮在阿克蘇承
辦事件及呼爾瑞等處敗賊時俱屬奮勉西安馬
甲高士勉繕寫摺奏勤慎願留軍營効力等語齊
克慎以辦理錢糧業經議叙陞用伊凌阿阿玉什
俱著以應陞之缺即用高士勉著以西安將軍銜
門筆帖式坐補

戊寅

命加賞伯克薩里等緞疋

上諭軍機大臣曰舒赫德奏稱伯克薩里等六人辦馬一百三十匹解至阿克蘓詳加驗看臚分頗好已照採買回人馬匹例每匹給價十二兩並賞給薩里等緞疋氊料等語薩里等辦解馬匹情願捐助殊屬可嘉雖經給與價值並賞給緞氊仍著酌量加賞緞疋以示獎勵

諭定邊左副將軍成袞扎布等撤回駐劄哈薩克邊界官兵

上諭軍機大臣曰額爾克沙喇等久在哈薩克邊界
此時信息若何若曾示以兵威即以朕旨宣示謂
阿布賚業已遣使入貢搶掠烏梁海一事係巴魯
克巴圖魯所為與伊等無涉不必進兵或但遣人
前往詢問亦即宣旨撤兵俱著傳諭成衮扎布酌
量辦理

護軍統領努三奏送擒捕嗎哈沁之厄魯特嚮
導錫喇庫本恩克勒德克蒙克津色楞及其家

口至京

命賞給緞疋安插於察哈爾旗分

欽定四庫全書

平定回疆方略續編
卷一

二十一

平定準噶爾方略續編卷一

欽定四庫全書

平定準噶爾方略續編卷二

乾隆二十五年夏四月庚辰

諭定邊左副將軍成衮扎布等查辦烏梁海總管事宜

上諭軍機大臣曰成衮扎布等奏據額爾克沙喇報稱烏梁海總管扎巴罕等游牧遠隔以致被掠又不加意防範致所屬逃走并疎脫看守之俘人布

什伯克請議罪示懲等語著傳諭成衮扎布等若
扎巴罕不過疎忽並無他故且尚能管轄所屬即
加以戒飭仍令安居若情有可疑即將扎巴罕解
京其總管之缺另行選補仍與察達克圖布慎等
商酌辦理

命赴新疆貿易旗民地方官就近給照行走

上諭軍機大臣曰同德奏稱北路蒙古等願以牲隻
來巴里坤哈密開展貿易者俱由烏里雅蘇台將

軍給與執照其由張家口歸化城前往之商民及內地扎薩克蒙古等因領照紆迴是以來者甚少等語新疆駐兵屯田商販流通所關最要著傳諭直隸山西督撫及駐劄將軍扎薩克等凡旗民願往新疆等處貿易除在烏里雅蘇台行走之人仍照前辦理外其張家口歸化城等處由鄂爾多斯阿拉善出口或由推河阿濟行走著各該地方官及扎薩克等按其道里給與印照較之專向烏里

雅蘓台一路可省四十餘日程途商販自必雲集
更於新疆有益該部即遵諭行

命乾清門侍衛訥齊訥棟保鼎庫納蘓魯克沁前往
阿克蘓聽叅贊大臣舒赫德差遣委用

賜二等侍衛鄂必達博沁巴圖魯號索倫總管塔濟
爾圖錫魯古敦巴圖魯號仍各賞銀一百兩

癸未

命傳諭都爾伯特部落加意收恤屬人

上諭軍機大臣曰理藩院奏都爾伯特溫圖呼爾等
因生計窮乏聞伊弟安插察哈爾告知該扎薩克
前往尋覓有違定例請遞解原旗令其管束等語
溫圖呼爾等窮乏求生實非得已又經告知該管
情尚可原著加恩即與伊弟一同安插但該部落
自投誠以來編設旗分佐領原欲伊等各安生業
若不善收恤漸至分散殊為可憫著成衮扎布傳
諭該扎薩克等其各加意撫綏勤於約束俾其守

分謀生不致流離失所副朕痼瘼一體之懷

命傳諭都爾伯特部落查明內大臣巴圖濟爾噶爾
家屬送京完聚仍按例折給該部落銀兩緞疋
定邊左副將軍成衮扎布等疏奏安插新附烏
梁海戶口事宜

成衮扎布等奏言額爾克沙喇等報稱二月間
在哈薩克附近之納林布魯勒等處收得烏梁
海原任總管阿喇善逃散之屬人蘓克色格什

等宰桑郭勒卓輝逃散之屬人楚魯木等又嗎
哈沁都楞烏拉岱托卜啟等俱情願歸附等語
臣等查此等降人向有收納之例請將楚魯木
都楞等二十一戶令內大臣察達克兼管烏拉
岱托卜啟等二十二戶蘓克色格什等四戶令
散秩大臣圖布慎兼管奏入得

旨如所請行

乙酉

乾清門侍衛德保欽天監監正明安圖監副三品
銜西洋人傅作霖四品銜高慎思侍衛五林泰
等繪畫回部輿圖還京

命賞緞各四端

丁亥

諭總兵容保傳示霍集斯子漠咱吧爾在途養疾從
容起程

上諭軍機大臣曰容保奏稱護送漠咱吧爾行至沙

臬子伊舊疾復發現令醫人調治似難速行等語
漠咱吧爾既有疾待醫即養息數日俟痊愈後從
容起程亦無不可伊父霍集斯已加恩優其廩祿
居住京師并有家書寄示著容保即交漠咱吧爾
閱看仍令其善為調攝與伊父相見有日也

戊子

諭叅贊大臣舒赫德等議奏酌補伊犁管轄屯田回
人伯克事宜

上諭軍機大臣曰舒赫德奏稱伊犁屯田回人一千
戶辦理陸續發往應設立阿奇木伯克等缺以資
管轄擬設三品阿奇木伯克一員請旨補授自四
品伊沙噶至六品密喇卜伯克十五員或以現任
伯克陞補或從著有勞績之人酌量選用其五品
以上伯克令戴孔雀翎六品伯克令戴藍翎等語
伊犁阿奇木伯克著額敏和卓之子木薩補授仍
以公品級管事其四品以下各員應先於阿桂現

在帶領之回人伯克內選補庶足以昭平允而示
鼓勵其作何酌量揀選補授之處著舒赫德會同
阿桂議奏所授伯克等品級及戴獎賞翎俱著照
所請行

諭吏部侍郎副都統海明葉爾羌掌印列名事宜

上諭軍機大臣曰據海明奏抵葉爾羌時與額敏和
卓章奏列名及掌管關防之處請旨遵行等語海
明係內地大臣額敏和卓雖加王爵究屬回人不

得與額駙策凌將軍成衮扎布為比著海明掌管
關防奏事列名在額敏和卓之前但伊不可以名
居前列即輕視額敏和卓額敏和卓老成諳練辦
理一切事宜當與和衷商酌則回人等益服我大
臣之虛懷於公務自有裨益

己丑

諭部院衙門及八旗大臣等毋得任意指駁咨詢事
件

上諭大學士曰定長以恩賞臺站人員等事咨詢兵部而該部以未經具奏請旨不便查辦駁回具奏從前各部院將外來咨文可以奏請辦理者往往任意指駁屢經訓飭今恩賞臺站人員久經降旨定長咨詢即當奏請辦理或謂其應先具奏則於奏內附叅亦無不可乃徑行駁回伊復准咨具奏往返稽遲徒滋案牘此皆推諉拘泥之陋習兵部堂司官著傳旨申飭嗣後准到各處咨文其應辦

理者即行奏辦或當叅奏亦即附叅若仍前推諉拘泥任意指駁必將定稿駁行之大臣加以處分著再通行各部院衙門及八旗大臣等知之

庚寅

命陝甘總督楊應琚即回本任

上諭軍機大臣曰前命楊應琚巡閱新疆會同舒赫德等查勘駐兵屯田事宜嗣據節次奏報情形屢降諭旨令其隨宜妥辦現在阿克蘇葉爾羌喀什

噶爾等處已有舒赫德專司其事自可次第經理
楊應琚身任總督內地事務亦關緊要且舒赫德
辦理事宜正資該督為之接應著傳諭楊應琚此
時既無會商事件即回總督之任并傳諭舒赫德
知之

辛卯

諭叅贊大臣阿桂等辦理駐兵搜賊事宜

上諭軍機大臣曰阿桂奏稱領兵過穆素爾嶺前抵

特克斯伊分兵二百五十名往阿勒坦和碩之阿
圭雅斯等處搜捕嗎哈沁餘兵護送回衆往海努
克屯田等語阿桂前奏領兵往塔爾巴噶台堵截
嗎哈沁等彼時因烏梁海被掠一事未知確實故
由北路派兵令策布登扎布帶領在塔爾巴噶台
堵截今已稔知哈薩克巴魯克巴圖魯所為遣使
往索停止進兵阿桂亦可俟來年有暇再往巡查
併傳諭舒赫德知之再舒赫德奏稱除阿桂帶往

兵丁外因豐訥亨送馬伊犁又派滿洲索倫察哈爾兵三百名合之前數共兵九百名等語從前阿桂議奏兵數僅五百名今年屯田收穫若不能給千人之食亦須預為籌畫並傳諭阿桂所駐兵丁惟準收穫穀石量其敷用與否如有不敷即將餘兵發回阿克蘇等處度歲亦可且接濟口食之牛羊併須乘時送往庶不致冒寒行走徒多傷斃舒赫德等當會商辦理又

諭曰阿桂奏伊領兵往阿主雅斯一路此時安泰若
即前來尚可會合但行文未能即達不便守候請
令伊在伊犁附近搜捕後即由博羅布爾噶蘓直
抵伊犁等語前諭伊等會兵特欲其兩路合圍同
至伊犁並非謂伊等但一合兵便可了事也安泰
此時已抵博羅布爾噶蘓亦未可定伊等宜互相
探聽隨便會合惟以搜捕盡淨為要至辦理嗎哈
沁與前此情形不同現在逃往哈薩克之厄魯特

等多以困苦來投或藏匿山谷以丐餘生亦不必
盡行勦殺當酌量招撫其台吉宰桑之可疑者解
送京師餘人分別安插以供差遣并須預為曉示
則降者必多否則伊等妄生疑懼或以死守或逃
往他處乘間滋擾臺站俱未可定此內若有哈薩
克錫喇等要犯斷不可疎脫併傳諭安泰等加意
奮勉從事

癸巳

命寬免烏梁海總管扎巴罕等革職治罪

上諭軍機大臣曰成衮扎布奏稱詢問烏梁海總管
扎巴罕從前內大臣察達克等傳令遷移游牧伊
仍行戀住致被哈薩克搶掠又不能約束屬人鄂
勒錐圖致令逃走詢問章京布特勒圖官兵拏獲
之哈薩克布什伯克等交令看守乃因睡疎脫俱
罪無可辭布特勒圖應請旨即行正法看守兵丁
碩達等應鞭一百穿箭遊營扎巴罕亦應正法但

年甫十七伊屬人藐玩成習情有可原應請革去
總管另行揀選承襲等語布特勒圖等疎脫賊犯
自應從重治罪但伊等俱係愚蠢之烏梁海布特
勒圖著從寬免其正法兵丁等亦僅予斥革示懲
免其鞭責穿箭扎巴罕不能管轄屬人疎脫賊犯
自應斥革姑念年幼無知從寬免其革職仍令辦
理總管事務察達克圖布慎等有與伊游牧相近
者著派員協同辦事仍以朕憫念伊等施恩曲宥

之處曉示知之

丙申

命副都統端濟布子伊達禮承襲三等輕車都尉世

職

己亥

命優卹故內大臣薩喇爾

上諭大學士曰內大臣薩喇爾人頗篤實効力有年
今患病溘逝深為軫惻著加恩派散秩大臣一員

侍衛十員往奠茶酒仍賞銀一千兩辦理喪事又諭軍機大臣曰薩喇爾病故伊兄布林現在熱河若欲來奠醢即由驛赴京或因天暑年邁艱於行走亦不必勉強惟令薩喇爾之子奔赴可也

壬寅

諭叅贊大臣阿里衮曉示拔達克山事宜

上諭軍機大臣曰拔達克山素勒坦沙接奉勅書賜物具表奏謝并陳土貢又致書阿里衮云伊與鄂

蘓伯克等部落相讐請兵二萬往勦阿里袞復書云爾前此搶掠魯斯塔克俘獲甚多今又請大兵示威鄰部擴充游牧不敢代為懇請為當睦鄰和衆以享升平之福等語阿里袞復書詞意甚為合理素勒坦沙等若因俘獻霍集占等致鄰部興兵攻伐伊等力不能支或失地來投我發兵戡定其難尚屬可行今欲藉兵威以開游牧自當明白曉示朕亦頒給勅書仍著傅虎等齎往再波羅泥都

之尸拔達克山人等雖傳聞為親隨伊犁雅斯盜
去已入昆都斯達勒罕但虛實未可知事屬既往
嗣後凡遇拔達克山使人不必再三詢問惟喀什
噶爾有伊等先壘或潛行埋瘞駐劄大臣等當留
心訪查傅虎等如齎送勅書可令先曉大意俾相
見時不致失詞俱著遵照辦理

賜拔達克山素勒坦沙

勅書

皇帝勅諭拔達克山素勒坦沙據駐劄葉爾羌大臣
奏爾奉到勅書賜物具奏陳謝并陳土貢又致書
大臣云從前爾部長密爾雜尼巴特與噶爾丹策
零和好曾向彼乞師二萬往攻昆都斯達勒罕安
第占之地諸鄂蘓伯克游牧俱歸附爾部落今因
為天朝効力誅戮霍集占等致與鄂蘓伯克等為
讐言祈轉奏大皇帝發兵二萬勦滅讐敵等語爾素
勒坦沙因呈送逆尸遣使入覲朕既特勅獎賞又

聽爾盡收俘獲使人至京疊申宴賚爾祇受朕恩
自當安生樂業奮勉圖報今覽爾所述情節朕嘗
聞爾舊部長瑪扎爾伯克之子密爾雜尼巴特曾
為鄂蘓伯克部落所擄瑪扎爾伯克以產寶石之
地及馬匹什物獻噶爾丹策零請得宰桑哈柳兵
萬人往鄂蘓伯克部落雖取回密爾雜尼巴特而
準噶爾人等乘便搶掠昆都斯達勒罕安第占俘
獲甚多後準噶爾向爾部落索取貢賦不與又遣

和托羅等六千人來攻瑪扎爾伯克始服厄魯特
回人等莫不知之夫噶爾丹策零之發兵其本意
豈相飲助特利爾貢賦又乘便搶掠爾鄰部是非
保愛之正所以侵擾之也朕爲天下共主無分內
外一體撫卹惟負恩肆逆如霍集占乃不能曲宥
其他循理守分之外藩未有無故興戎者即如準
噶爾素稱强悍肆擾諸部其後自相殘賊朕以仁
愛生靈之故始發兵平定厥後霍集占遁入爾地

將軍大臣等咸請進兵朕恐致驚擾諭令駐師邊
界遣使索取皆爾素勒坦沙所知爾既著有勞績
若鄰部果因爾內附恃強欺弱結黨尋釁或致力
不能支自當告之葉爾羌大臣請旨發兵以申天
討若爾地並未侵削更欲開擴游牧無故請兵并
吞諸部則非以大恤小之義朕心有所不忍且內
地兵馬甚多數萬人無難調集但距爾地頗遠若
抵爾游牧所需芻糧宿舍恐未能供應徒滋驚擾

耳爾既誠心效順惟宜約束所部和輯鄰封不可
自啟釁端以招外侮長子孫而綿福祿計無踰此
今以頒降勅書賜爾蟒緞四端爾其欽聽朕言永
承恩澤特諭

命加侍郎海明都統職銜

上諭軍機大臣曰葉爾羌現有海明辦事阿里衮即
可回京嗣後海明行文拔達克山諸部落俱列銜
於額敏和卓之前但品秩未崇恐見輕屬國著授

為蒙古旗分都統其益加奮勉以副優擢至新柱抵葉爾羌後凡開列名銜又當居首俱傳諭知之諭乾清門三等侍衛舒常等厄魯特兵俘獲人口聽

其帶回游牧毋庸另行辦理

上諭軍機大臣曰舒常奏鄂齊爾告稱所攜俘獲人等情願於官給錢糧內自行養贍帶回等語從前因鄂齊爾等俘獲頗多沿途行走未便官為廩給故傳諭舒常吳達善等作為已意曉示若伊等能

於所得分例通融養贍即准帶回或力有不能則
變價出售亦可代為辦理今伊等既稱通融減省
足敷口食仍聽帶回游牧無庸另辦

癸卯

命錄用回人薩哈勒索丕等

上諭軍機大臣曰內務府奏新編回人佐領內應補
驍騎校一員領催四員薩哈勒索丕著加恩授為
驍騎校仍賞緞二端其同來之們多索丕呢雅斯

索丕業經編入佐領若們多索丕能管轄人戶即
拔補領催

授副都統愛隆阿為正白旗護軍統領仍兼鑲白旗
蒙古副都統瑪常仍兼正白旗漢軍副都統

叅贊大臣舒赫德疏奏審訊清馥罪案

舒赫德奏言臣奉到審訊清馥

諭旨隨差人於四月初三日將清馥帶至阿克蘇將
飾詞具奏情由逐款審訊據清馥親供藍翎侍

衛毛庫本等招降嗎哈沁斗齊令其先來投見
行至中途忽將伴送之金國輔尼瑪殺害逃脫
本欲據實具奏令隨印之寧夏防禦巴什勒繕
摺巴什勒以為不便毛庫本亦再三懇求一時
昏憤飾詞欺罔罪無可辯至巴里坤大臣等叅
奏逗遛近地未曾深入則所行道路隨從官兵
俱可詢問臣因清馥既經認罪即遵

旨監看正法謹恭錄

諭旨及審訊供詞通行各駐劄大臣知悉奏入得
旨下部知之

命革寧夏防禦巴什勒職効力贖罪

五月丙午

諭管理屯田副都統定長等安設卡倫防範北山逸

賊

上諭軍機大臣曰納世通奏稱庫車一帶通北山各
嶺處所俱安設卡倫派回人瞭望防守等語所奏

殊中肯綮現在阿桂等駐兵伊犁搜捕嗎哈沁伊
等無可棲止或越嶺侵犯回人村莊乘間盜竊臺
站馬匹俱未可定著傳諭各駐劄大臣等將北山
要隘可通回地者俱安設卡倫派兵防範仍不時
委員巡查嚴拿逸出賊匪不可少有疎忽

議烏魯木齊設官事宜

陝甘總督楊應琚奏言烏魯木齊現議移駐提
督應設管理糧餉文員請照哈密巴里坤之例

添設同知一員管理地方監放兵餉通判一員
收支糧儲并設倉大使一員又巡檢二員分駐
昌吉羅克倫兩處統歸哈密兵備道管轄奏入
得

旨軍機大臣議奏尋議伊犁以迄回部一切駐兵屯
田自當另為經理至附近內地等處如烏魯木
齊以至昌吉羅克倫一切管轄地方收支錢糧
自應添設文職應如所請行其添設各員缺該

督又請將漢中府同知同州府通判韓城洋縣
縣丞西安府照磨裁汰移駐改補亦照原議辦
理奏入得

旨同知著定為滿缺餘依議

丁未

諭總督管甘肅巡撫吳達善查奏酌撥軍需銀兩事
宜

上諭軍機大臣曰吳達善請於鄰省撥銀六十七萬

餘兩協濟為涼州寧夏莊浪等營加折糧料之用
部議以該撫甫經兩次撥銀三百八十萬兩備用
應即在二次撥解銀兩內動支等語該撫前請撥
銀八十萬兩原係接准楊應琚移咨即行奏請後
該處屯田駐兵事宜概從緩辦則所撥前項銀兩
自屬充裕且現在軍務告竣諒亦無甚急需著傳
諭吳達善此次請撥銀兩即照部議在第二次撥
解銀八十萬兩內動支是否足敷應用將來不致

缺少之處可詳查具奏

戊申

命致祭穆素爾嶺

上諭軍機大臣曰舒赫德奏稱過穆素爾嶺下至山麓有澗名塞塞克愛噶爾雅勒其險處約四十餘里一值風雪即難行走必須住候晴霽從前準噶爾於其地樹旛誦經致祭今四月初旬遞送事件兵丁有凍斃者酌於附近之克斯地方造屋以資

避禦等語穆素爾嶺為往來要路今山澗險阻猝
遇風雪人力難施蒙古風俗俱誦經致祭著傳諭
舒赫德如回人內有善於襪襪者令其虔誠將事
或無其人即遣厄魯特人致祭

叅贊大臣舒赫德等疏奏解送伊犁馬駝軍器
事宜

舒赫德等奏言四月初七日五吉解馬至阿克
蘇臣等挑選三四分臚之馬八百餘匹阿桂前

欽定四庫全書

平定準噶爾方略續編

卷二

三

次所領官兵及此次豐訥亨所領官兵分別增
給馬匹於初十日起程前往伊犁餘馬一千三
百餘匹派員於阿克蘇附近牧放備用又選駝
一百一十七隻添送威遠礮一位及火藥鉛繩
等項俱交豐訥亨帶往奏入報

聞

辛亥

授革職侍郎德爾格為郎中遇缺即補馳驛前往闕

展隨同副都統定長辦事

甲寅

命革縣丞鮑立應職仍照發遣例留巴里坤安插

上諭軍機大臣曰同德叅奏協辦錢糧之縣丞鮑立應因回民孫起雲與差役馬九互毆違例將年逾七十之孫起雲濫刑致斃請交部嚴加議處等語鮑立應徇庇衙役違例杖斃無辜此等殘酷之員若不重治其罪何以示懲鮑立應著革職枷號示

衆滿日仍照發遣民人之例留於該處同德將此等劣員僅請交部議處著傳旨嚴加申飭

乙卯

諭烏魯木齊辦事副都統永瑞等市易馬匹事宜

上諭軍機大臣曰烏魯木齊市易哈薩克馬一百三十餘匹現議暫於巴里坤牧放俟秋季得馬既多再遣侍衛等前往分羣駐牧等語此項馬匹若候解到之日始派員設立牧場未免遲悞著傳諭永

瑞等就哈薩克貿易情形計至秋季得馬若干先行具奏以便派員前往再從前與哈薩克貿易每取其駙馬今既立牧場則多收兒騾馬匹方有孳息但不可使知此意祇云奉有恩旨因爾等既帶兒騾馬匹不必專收駙馬致勞往返嗣後一體交易俟安泰從伊犁轉回併傳諭知之

恩免按察使銜納世通遺漏賞冊處分

上諭軍機大臣曰據納世通奏稱從前辦理分賞各

城回衆時僅辦理庫車沙雅爾兩城遺漏賽里木
拜除補行分賞外請交部嚴加議處等語此等無
心遺漏旋即覺察即請嚴加議處則疎脫逃人及
進兵不力又當作何辦理納世通著從寬免其議
處惟穆素爾嶺係阿克蘇伊犁要路著納世通酌
派官兵不時巡查臺站搜捕嗎哈沁以靖地方

丁巳

命軍前効力撤回官員先補該旗額缺

上諭軍機大臣曰黑龍江正黃旗滿洲驍騎校員缺該將軍等以獎賞藍翎領催嘉哈圖金圖擬正獎賞藍翎前鋒錫克索賚領催坦色木保擬陪請旨驍騎校員缺著擬正之嘉哈圖金圖補授擬陪之錫克索賚坦色木保俱著記名年來官兵因軍前有功額外授職者甚多各該旗缺出應先將此項官員補授俟錄用既徧再照舊例揀選應陞人員庶軍前効力者不致壅滯著交各該旗遵照辦理

命賞故二等侍衛多隆武恩騎尉世職

上諭軍機大臣曰二等侍衛多隆武在呼爾瑞等處
擊賊頗屬奮勉今於軍營病故雖非陣亡可比亦
殊堪軫念著加恩賞給恩騎尉准襲一次仍賞銀
五十兩

戊午

辦理伊犁屯田副都統伊柱疏奏海努克興屯

事宜

伊柱奏言臣同阿桂分路領屯田回人前來伊犁於三月二十八日至海努克其地舊有廟宇又有築成營壘周圍俱可耕種即將官兵駐劄與屯田回人相隔二三里易為防護其應行安臺瞭望之處自東北塔前起至東南離本營四五十里伊犁河南安臺五處其屯田回人三百餘名約相隔半里立一村莊共十五處於四月初二日起各修葺溝渠引水灌田計本月二十

欽定四庫全書

平定準噶爾方略續編

卷二

十五

日所攜粟麥可播種全完其回人所分各莊均有牆垣基址暫行搭蓋窩舖俟農隙即伐木造房臣等駐劄處所有廟宇二所喇嘛等大小住房百餘間雖俱倒壞加以修葺尚可駐兵六七百名俟阿桂轉回再行酌定具奏奏入

上諭軍機大臣曰伊犁奏稱屯田兵丁已抵伊犁之海努克現在安設村堡修理溝渠等語看來伊犁屯田俱有舊蹟將來漸次開拓更於軍食有裨著

傳諭伊柱於一切應辦事宜先時相度加意奮勉督策回人盡力耕耘勿為偷惰其地畝數目收穫情形可遇便陸續奏聞

諭御前侍衛署副都統安泰搜捕嗎哈沁事宜

上諭軍機大臣曰伊柱奏安泰至鄂勒濟因大水暫駐河沿等語安泰既抵伊犁又經休息可即於塔爾巴噶台一帶搜捕嗎哈沁若不能前往即由舊路回烏魯木齊可也

命議叙解送馬匹之都司永成等

上諭軍機大臣曰舒赫德奏都司永成等由烏魯木
齊送馬一千餘匹時值秋末草黃沿途僅倒斃十
五匹應遵旨查奏請將永成等交部議叙其原任
藍翎侍衛達爾扎桑作何加恩之處一併請旨等
語前經書山奏派永成等送馬至阿克蘓即諭舒
赫德俟到時查奏今既辦理妥協著將都司永成
防禦布岱千總高天德把總龍顯奇等交部議叙

兵丁等賞給一月錢糧達爾扎桑著加恩准其開復

命定新疆兵丁回人等盜馬之例

上諭軍機大臣曰舒赫德奏拏獲阿克蘓盜馬回人拜密爾咱因係積匪賊犯照回人舊例斬決梟示等語回地新經平定拏獲匪犯自應從重辦理但內地或間有無恥兵丁僕役等偷盜回人馬匹若仍照內地之律完結非所以示懲創著傳諭辦理

回部事務大臣等嗣後回人盜本處及內地人馬
匹俱照伊等舊例其內地人有犯亦照此例辦理
併通行曉諭知之

陝甘總督楊應琚等疏奏改設臺站事宜

楊應琚等奏言查南路一帶戈壁本多自哈喇
沙爾至庫車千餘里內如哈喇布拉克至策得
爾計二百四十里玉古爾城至托和壘亦二百
四十里俱係戈壁又東至碩爾舒克六十里西

至庫爾勒七十餘里有山岡二十四處馬匹易
於倒斃臣等詢知玉古爾城至托和鼎戈壁十
餘里有阿爾巴特一處可得水草又距托和
鼎七十里有地名喀喇烏蘇頗饒水草行八十
里可至阿爾巴特至庫爾勒等處山岡外沿河
另有捷徑不過將山麓剷削簽樁補土如棧道
式人馬俱可安行較之踰越山岡計可省三十
餘里臣楊應琚書山定長和其束等會商前因

玉古爾城至托和鼎戈壁甚遠故於二站安設
三站馬匹今既有水草之地應將多備馬匹撥
出於阿爾巴特安設一臺再於喀喇烏蘓安設
腰站在各臺馬內抽撥則道里之遠近維均而
馬駝之往來尤便奏入得

旨如所議行

平定準噶爾方略續編卷二

至庫爾勒七十餘里有山岡二十四處馬匹易
於倒斃臣等詢知玉古爾城至托和鼎戈壁十
餘里有阿爾巴特一處可得水草又距托和
鼎七十里有地名喀喇烏蘇頗饒水草行八十
里可至阿爾巴特至庫爾勒等處山岡外沿河
另有捷徑不過將山麓剷削簽樁補土如棧道
式人馬俱可安行較之踰越山岡計可省三十
餘里臣楊應琚書山定長和其束等會商前因

玉古爾城至托和鼎戈壁甚遠故於二站安設
三站馬匹今既有水草之地應將多備馬匹撥
出於阿爾巴特安設一臺再於喀喇烏蘓安設
腰站在各臺馬內抽撥則道里之遠近維均而
馬駝之往來尤便奏入得

旨如所議行

平定準噶爾方略續編卷二